

BOSNA I HERCEGOVINA

OSNOVNI SUD BRČKO DISTRIKTA BOSNE I HERCEGOVINE

Broj: 096-0-Su-26-001119

Brčko, 05.03.2026.godine

Osnovni sud Brčko distrikta Bosne i Hercegovine, predsjednik suda Dragan Tomaš, na osnovu člana 25. Zakona o sudovima Brčko distrikta Bosne i Hercegovine („Sl. glasnik Brčko distrikta BiH“ br. 18/2020-prečišćen tekst) u postupku implementacije Zakona o zaštiti ličnih podataka („Sl. glasnik BiH“ br. 12/2025), donosi:

PRAVILA PRIVATNOSTI

Cilj Pravila privatnosti Osnovnog suda Brčko distrikta Bosne i Hercegovine (u daljem tekstu: Sud) u skladu sa članom 14. Zakona o zaštiti ličnih podataka (u daljem tekstu: Zakon), je da svim licima, čije lične podatke obrađuje, pruži osnovne informacije o navedenoj obradi na transparentan način.

Pravila privatnosti se primjenjuju na sve lične podatke koje Sud prikuplja, upotrebljava ili na drugi način obrađuje, direktno ili putem drugih kontrolora.

Lični podatak je svaki podatak koji se odnosi na fizičko lice čiji je identitet utvrđen ili se može utvrditi.

Obrada ličnih podataka je svaki postupak ili skup postupaka koji se obavlja na ličnim podacima ili na skupovima ličnih podataka, automatizovanim ili neautomatizovanim sredstvima kao što su prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prenosom, širenjem ili stavljanjem na raspolaganje na drugi način, usklađivanje ili kombinovanje, ograničenje, brisanje ili uništavanje.

Kontrolor podataka je fizičko ili pravno lice, javni organ ili nadležni organ koji samostalno ili s drugim određuje svrhe i sredstva obrade ličnih podataka.

1. Pravni osnov za obradu ličnih podataka

Vaše lične podatke Sud obrađuje u skladu sa članom 8. stav 1. tačka c) i e) Zakona, izvršavajući svoje pravne obaveze i ovlaštenja.

2. Svrha obrade ličnih podataka

Osnovni sud Brčko distrikt BiH stvarno je nadležan za sve prvostepene sporove kao sud opšte – univerzalne nadležnosti.

Nadležnost, unutrašnje uređenje i rad suda regulisani su Statutom Brčko distrikta BiH, Zakonom o sudovima Brčko distrikt BiH i Pravilnikom o unutrašnjem sudskom poslovanju

1. U krivičnim predmetima da u prvom stepenu sudi:

- za sva krivična djela izuzev krivičnih djela koja su u nadležnosti Suda BiH;
- za krivična djela za koja je Sud Bosne i Hercegovine prenio nadležnost na Osnovni sud;
- da postupa nakon podizanja optužnice u skladu sa zakonom;
- da odlučuje o brisanju osude i prestanku mjera bezbjednosti i pravnih posljedica osude, na osnovu sudske odluke.

2. U građanskim predmetima da u prvom stepenu sudi :

- a) u svim građanskim sporovima;
- b) u vanparničnom postupku;
- c) u upravnim sporovima;
- d) u svim privrednim sporovima;
- e) u postupku stečaja i likvidacije;
- f) u sporovima o ocjenu ustavnosti, statutarnosti i zakonitosti.

3. U prekršajnim predmetima :

- a) da preduzima sve zakonske predviđene radnje u razrješavanju prekršajnih predmeta;
- b) da preduzima zakonom predviđene radnje za izvršenje izrečenih prekršajnih sankcija.

4. U drugim predmetima :

- a) da provodi izvršni postupak;
- b) da određuje mjere obezbjeđenja;
- c) da rješava u posebnim postupcima, ako zakonom nije drugačije određeno;
- d) da obavlja zemljišnoknjižne poslove;
- e) da pruža pravnu pomoć sudovima u Bosni i Hercegovini;
- f) da vrši poslove međunarodne pravne pomoći;
- g) da vodi registar pravnih subjekata ako je to zakonom uređeno;
- h) da postupa po zahtjevu za ostvarivanje prava na pravnu pomoć u skladu sa članovima 13-21 zakona o Kancelariji za pravnu pomoć Brčko distrikta BiH;
- i) da vrši druge poslove određene zakonom.

3. Prava nosilaca podataka u vezi sa obradom ličnih podataka

- **Pravo na pristup ličnom podatku** – u okviru ovog prava mogu se tražiti informacije o svrsi obrade, kategoriji ličnog podatka koji se obrađuje,

predviđenom roku u kojem se čuva lični podatak, primaocu ili kategorijama primalaca kojima je lični podatak otkriven ili će biti otkriven. Pristup ličnom podatku može biti ograničen samo u slučajevima kada je posebnim zakonom propisano ograničenje.

- **Pravo na ispravku ličnog podatka** – pravo zahtijevati ispravljanje ili dopunjavanje netačnog ličnog podatka ako podataka nije tačan ili potpun. U zahtjevu navesti što nije tačno i potpuno, te u kojem smislu bi trebalo navedeno ispraviti, te dostaviti potrebnu dokumentaciju u prilog svojih navoda.
- **Pravo na prigovor** – pravo u svakom trenutku podnijeti prigovor kontroloru podatka na obradu ličnog podatka u skladu sa članom 8. stav 1. tačke e) ili f) Zakona, uključujući profilisanje zasnovano na tim odredbama.
- **Pravo na brisanje** – ako lični podatak više nije potreban za svrhu za koju je prikupljen, ako je nosilac podatka povukao saglasnost na kojoj je obrada zasnovana, ako je nosilac podatka uložio prigovor na obradu u skladu sa članom 23. stav 1. Zakona i ne postoje zakonski razlozi za obradu ili je nosilac podatka uložio prigovor za obradu u skladu sa članom 23. stav 2. Zakona, ako je lični podatak nezakonito obrađen, ako ne postoje drugi pravni osnovi za obradu podataka.
- **Izuzeci za ostvarivanje prava na brisanje** – radi ostvarivanja prava na slobodu izražavanja i informisanja, radi poštivanja zakonske obaveze kojom se zahtijeva obrada propisana posebnim zakonom, a koja se primjenjuje na kontrolora podataka ili radi izvršenja zadatka koji se obavlja u javnom interesu ili u izvršenju službenih ovlaštenja dodijeljenih kontroloru podataka, u svrhu arhiviranja u javnom interesu, u svrhe naučnog ili istorijskog istraživanja ili u statističke svrhe u skladu sa članom 56. stav 1. Zakona, u mjeri u kojoj je vjerovatno da se pravom iz stava 1. može onemogućiti ili ozbiljno ugroziti ostvarivanje ciljeva, te obrade ili radi postavljanja, ostvarivanje ili odbrane pravnih zahtjeva.

4. Sigurnost ličnih podataka

Podaci se obrađuju tako da se osigurava odgovarajuća sigurnost ličnih podataka, uključujući i zaštitu neovlaštene ili nezakonite obrade i od slučajnog gubitka, uništenja ili oštećenja primjenom odgovarajućih tehničkih ili organizacionih mjera.

5. Prenos ličnih podataka drugim kontrolorima podataka

Lične podatke sud prenosi drugim kontrolorima podataka – pružaocima informatičko-komunikacionih usluga sa kojima ima sklopljen ugovor na način da se poštuju pravila postupanja sa ličnim podacima. Lične podatke Sud će dati trećoj strani ukoliko je to

potrebno za izvršavanje zakonom propisanih obaveza treće strane ili ukoliko je to neophodno za izvršavanje legitimnih interesa treće strane.

Lične podatke Sud neće prenositi u svrhu direktnog marketinga.

6. Vremenski period čuvanja ličnih podataka

Lični podaci se čuvaju onoliko koliko je potrebno za svrhu zbog koje se obrađuju. Lični podaci mogu se čuvati i duži vremenski period, nakon prestanka svrhe za koju se obrađuju, gdje se čuvaju u arhivi onoliko vremena koliko obavezuju zakonski propisi u arhivskoj građi.

7. Podaci o službeniku za zaštitu ličnih podataka

Mira Jović, diplomirani pravnik u zemljišnoknjižnom uredu Osnovnog suda Brčko distrikta Bosne i Hercegovine

E-mail: m.jovic@osbd.ba

Tel: 049/216-499 lokal 358

Službenik za zaštitu ličnih podataka ne daje pravne savjete drugim kontrolorima i obrađivačima podataka. Osnovna uloga službenika je davanja savjeta i preporuka o obradi ličnih podataka rukovodstvu i zaposlenicima Suda koji rade na poslovima obrade ličnih podataka, te nosiocima ličnih podataka čiji se lični podaci obrađuju od strane Suda.

8. Kontakt informacije

Osnovni sud Brčko distrikta Bosne i Hercegovine, ulica Trg pravde 10, 76100 Brčko distrikt Bosne i Hercegovine, tel: 049/216-499, fax: 049/216-194, e-mail: osbd@osbd.ba.

 **Predsjednik suda**
Dragan Tomaš